

# INUIT ATAQATIGIIT INATSISARTUNI



UPA2023/69

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Nunatsinni meeqqat inuusuttullu kommunini tamani suliassangortitat annertuumik navianartorsiortut nalunaarsorneqarsimallutik inissisimasut kiisalu meeqqat inuusuttullu pillugit suliat suliarineqarsimangitsut pillugit kommunit peqatigalugit Naalakkersuisut immikkut annertusisamik iliuseqarnissaannik peqquneqarnissaannut Inatsisartut aalajangiiffigisassattut siunnersuut.**

(Inatsisatunut ilaasortat, Eqaluk Høegh, Inuit Ataqatigiit)

## **Oqaaseqaat:**

Nunatsinni meeqqanut inuusuttunullu atugarliortunut pitsaanagerusumik suliniuteqarnissaq pillugu kalaallit danskillu oqartussaasoqarfiisa assigiinngitsunik suliallit akornanni suleqatigiinneq pillugu anguniakkanik malittarinninnerup atulersitsinerullu killiffii pillugit nalunaarusiaq kingulleq upernaq 2022-mi saqqummiunneqartoq<sup>1</sup> naapertorlugu, nunatsinni meeqqat inuusuttullu kommuneqarfinni tamaginni suliassangortinneqarsimasut annertuumik navianartorsiortut nalunaarsorneqarsimasut (aappalaartumik qalipaaserlugit nalunaarsukkat) kiisalu isumaginninnikkut sulinermi misissuinissamik pisariaqartitsisut suliarineqarsimangitsut nalunaarsorneqarsimasut amerlavallaarujussuartut takuneqarsinnaavoq.

Pissutsit taamaannerat akuerineqarsinnaangilaq. Meqqat atugarliortut

---

<sup>1</sup> [Kalaallit Nunaanni meeqqanut inuusuttunullu atugarliortunut pitsaanagerusumik suliniuteqarnissaq pillugu kalaallit qallunaallu oqartussaasoqarfiisa assigiinngitsunik suliallit akornanni suleqatigiinneq, Killiffik pillugu nalunaarusiaq upernaq 2022, 'Anguniakkanik malittarinninnerup atulersitsinerullu killiffii'](#)

# INUIT ATAQATIGIIT INATSIARTUNI



pisariaqartitsisullu erngertumik ikiorserasuarneqarnissaat pisortat isumannaarsinnaangippassuk ajorluinnartumut killissimassaagut. Kialluunniit assortorsinnaangilaa maanna nunatsinni ajorluinnartumut killissimagatta immikkullu iliuuseqartoqarnissaa pisariaqalivissimammat.

Nunatsinni meqqat pitsaasumik atugaqaqqullugit iliuutsit pisortatigut ingerlanneqartut naammaginangeqisut nalunaarusiarpassuit paasissutissallu maanna pissarsiarisatta takutippaat.

Tamanna Inatsisartunut ilaasortat aammalumi partiit tamarmik akuersaarnagu immikkut iliuuseqartoqarnissaa piaartumik pissasoq kissaatigigaat arajutsisassaangilaq. Inatsisartut ukiakkut 2022-mi ataatsimiinneranni partiit tamarmiullutik piaartumik iliuuseqartoqarnissaanik oqariartuuteqartarput – minnerunngitsumillu Inatsisartut ombudsmandiata nalunaarutaa saqqummiunneqarmat tamanna uteqqinneqarpoq.

Kialluunniimmi takunngitsoorsinnaangilaa meeqqat inuusuttullu pillugit suliassanngortitat kukkuluttoorfiusumik – pisinnaatitaaffiisalu uniorluinnarlugit – ingerlatsisoqartarnera annertuumik inissisimasoq. Piffissanngorporlu maanna kommunini meeqqat inuusuttullu suliassanngortitat pillugit kommunit kivitsiniarnermikkut annertuumik ajornartorsiuteqarnerat pillugu inatsisartut isummernissaat.

Taamaaliortariaqarpugut akuersaarneqarsinnaangimmat nunatsinni meeqqat inuuniarnermikkut ikorfartorneqarnissamik pisariaqartitsisut pisortat kiffartuussineranni naammangilluinnartumik ikiorsiisarnerit ingerlanneqartarsimangimmata.

# INUIT ATAQATIGIIT INATSIARTUNI



Naak ukiuni kingullerni danskit nalagaaffiat peqatigalugu immikkut suliniutit ingerlanneqaraluartut, paasissutissat takutipaat suli annertunerusumik suliniuteqartariaqartugut. Tamannalu qulakkeerniarlugu Naalackersuisut sakkortusisamik kommunit peqatigalugit immikkut suliniutinik aaqqiissutissanillu aallartitsinissaat pisariaqavippoq.

Siunnersuut una isumaqatigineqarpat akuersinermi ilanngullugu suliniutit nutaat annertusisat aningaasatigut annertunerusumik pisariaqartitsisoqassasoq paasinarsippat inatsisartunut immikkut qinnutigineqarumaartut naatsorsuutigaarput. Aningaasartuutissallu annertussusissaat Naalackersuisuniit qulaajarneqareerpata immikkut ittumik Inatsisartunut akuerisassanngorlugit ingerlatinneqarnissaat naatsorsuutigaarput.

Isumaqarpugut meerartavut immikkut suliniuteqarfigineqarnissaat pillugu kommunit aningaasatigut kivitsisinnaassuseqarnerat ilanngullugu pingaarutilittut nalilersuiffigineqassasut, soorunami aningaasatigut aporfeqaratik sulisinnaanissaat sapinggisamik qulakkeerneqassasoq kissaatigaara.

Suliat iluatsissappata, aamma nunatsinni meeqqat ikiorserneqartariaqavissutut inissisimasut ikiussagutsigit taava kivitseqatigiilluta immikkut sulineq allartinniartigu. Inatsisartunilu nunatsinni pissutsit ilungersunartut qulaani taaneqartut pillugit – utaqqeqqinngikkaluarluta – iliuseqartoqarnissaanut atatillugu tamattaalluta oqallilluarnissarput – kivitseqatigiinnissamik anersaaqarluta – ingerlanneqarnissaa pisariaqarpoq. Aatsaammi taama iliornikkut ajornartorsiut annertoqisoq aaqqiiviginiarneqarsinnaammat.

Neriuppugut siunnersuut una Naalackersuisuniit minnerunngitsumillu aamma partiinit tamaniit tigulluarneqarluni oqallisigineqarluarumaartog.

# INUIT ATAQATIGIIT INATSISARTUNI



## **Pisortanut aningaasatigut allaffissornikkullu kingunerisassai:**

Siunnersuut Namminersornerullutik Oqartussanut aningaasartuutaassanngilaq, allaffissornikkulli Namminersorlutik Oqartussat iluani annerpaamik A/C siunnersortip ukioq ilivitsumik sulineratut naleqassaaq.

Siunnersuut akuerineqarpat pisariaqartutullu aningaasartuuteqarfissatut nalilerneqarpat immikkut iliuuseqarnertut isigalugu Naalakkersuisut immikkut aningaasaliinissanut Inatsisartut Aningaasaqarnermut Akileraartarnermullu Ataatsimiititaliaanut qinnuteqaataasussaaq.

## **Namminersortunut aningaasaatigut allaffissornikkullu kingunerisassai:**

Soqanngilaq.

## **Innuttaasunut aningaasatigut allaffissornikkullu kingunerisassai:**

Soqanngilaq.